

UNDANG – UNDANG KECIL

CETAKAN SEMULA

**UNDANG-UNDANG KECIL PEMUNGUTAN,
PEMBUANGAN DAN PELUPUSAN SAMPAH-SARAP
(MAJLIS BANDARAYA SUBANG JAYA) 2007**

Mengandungi segala pindaan hingga 10 Disember 2020.

AKTA KERAJAAN TEMPATAN 1976
UNDANG-UNDANG KECIL PEMUNGUTAN, PEMBUANGAN DAN
PELUPUSAN SAMPAH-SARAP (MAJLIS BANDARAYA
SUBANG JAYA) 2007

SUSUNAN UNDANG-UNDANG KECIL

BAHAGIAN I

PERMULAAN

1. Tajuk ringkas dan permulaan kuat kuasa
2. Pemakaian
3. Tafsiran

BAHAGIAN II

LARANGAN MEMBUANG SAMPAH

4. Larangan membuang sampah di tempat awam
5. Meletakkan sampah-sarap di atas jalan
6. Tong sampah
7. Pembuangan sampah-sarap rumah
8. Sampah di bangunan berbilang tingkat
9. Sampah-sarap taman
10. Sampah-sarap kelengkapan rumah
11. Buangan efluen
12. Pembuangan buangan perindustrian dan buangan perdagangan
13. Kawasan tempat pembuangan sampah
14. Membuang kenderaan buruk dan tidak berguna
15. Larangan mengganggu isi kandungan tong sampah
16. Larangan membakar bahan buangan
17. Larangan membuang arang batu, bahan letupan, *dsb.*
18. Kawasan kampung
19. Fi

BAHAGIAN II
PENGUATKUASAAN

20. Kuasa penangkapan
21. Kuasa menyita

BAHAGIAN II
AM

22. Penalti am
23. Pendakwaan
24. Pengkompaunan kesalahan
25. Kuasa pegawai polis di bawah Undang-Undang Kecil ini
26. Pembatalan dan peruntukan penalti

AKTA KERAJAAN TEMPATAN 1976

UNDANG-UNDANG KECIL PEMUNGUTAN, PEMBUANGAN DAN
PELUPUSAN SAMPAH-SARAP (MAJLIS BANDARAYA
SUBANG JAYA) 2007

PADA menjalankan kuasa yang diberikan oleh seksyen 73 Akta Kerajaan Tempatan 1976 [Akta 171], Majlis membuat dan menurut seksyen 103 Akta tersebut, Pihak Berkuasa Negeri mengesahkan, undang-undang kecil yang berikut:

BAHAGIAN I

PERMULAAN

Nama dan permulaan kuat kuasa

1. (1) Undang-Undang Kecil ini bolehlah dinamakan **Undang-Undang Kecil Pemungutan, Pembuangan Dan Pelupusan Sampah-Sarap (Majlis Bandaraya Subang Jaya) 2007**.

(2) Undang-Undang Kecil ini mula berkuat kuasa pada 19 Julai 2007.

Pemakaian

2. Undang-Undang Kecil ini hendaklah terpakai hanya bagi kawasan pentadbiran Majlis Bandaraya Subang Jaya.

Tafsiran

3. Dalam Undang-Undang Kecil ini, melainkan jika konteksnya menghendaki makna yang lain –

“bahan buangan” termasuklah apa-apa keluaran sampingan, benda atau barang yang dibuang, ditolak atau rosak dalam proses pengilangan sama ada mempunyai nilai perdagangan atau tidak;

“bahan buangan bangunan” ertinya sampah yang dihasilkan semasa pembinaan rumah atau bangunan atau projek dan termasuklah apa-apa batu, kayu, pasir, tanah, simen, atap, zink atau bahan binaan lain;

“buangan perdagangan” ertinya apa-apa bahan buangan yang dijanakan oleh apa-apa aktiviti perdagangan;

“buangan perindustrian” ertinya apa-apa cecair buangan atau bahan buangan yang dijanakan daripada apa-apa aktiviti perindustrian;

“buang sampah” mempunyai erti yang sama yang disebutkan di bawah seksyen 47 AktaJalan, Parit dan Bangunan 1974 [Akta 133];

“efluen” ertinya kumbahan termasuklah –

- a. cecair buangan yang dihasilkan di mana-mana premis; dan
- b. apa-apa pelepasan yang dijanakan oleh proses perindustrian.

“Majlis” ertinya (Majlis Bandaraya Subang Jaya);

“sampah-sarap isi rumah” ertinya apa-apa bahan buangan yang dijanakan dari rumah tetapi tidak termasuk sampah-sarap taman atau bahan buangan bangunan;

“sampah-sarap taman” termasuk daun, rumput, penjalar, pokok, dahan, atau tanah dari taman atau perkarangan sesebuah rumah atau bangunan atau jika tidak ada rumah atau bangunan, dari mana-mana tanah;

“tempat awam” mempunyai erti yang diberi kepadanya di bawah Akta Kerajaan Tempatan 1976 dan termasuklah setiap lebuh raya, lebuh, jalan, jambatan, medan, jalan kecil, lorong, taman awam dan setiap panggung, tempat hiburan awam atau tempat kunjungan awam yang dikenakan bayaran untuk masuk atau tidak, atau orang awam mempunyai akses.

BAHAGIAN I

LARANGAN MEMBUANG SAMPAH

Larangan membuang sampah

4. Tiada seorang pun dibenarkan membuang apa-apa sampah di mana-mana tempat awam atau mana-mana tempat yang tidak ditetapkan oleh Majlis sebagai tempat buang sampah.

Meletakkan sampah-sarap di atas jalan

5. Tiada sampah-sarap, kotoran atau seumpamanya boleh diletakkan di mana-mana tempat awam kecuali dengan cara yang ditetapkan oleh Majlis.

Tong sampah

6. Tuan punya atau penghuni tiap-tiap rumah atau bangunan hendaklah mempunyai tong sampah yang bertutup dan hendaklah diselenggara dalam keadaan baik.

Pembuangan sampah-sarap rumah

7. (1) Semua sampah-sarap isi rumah hendaklah diisi dalam beg plastik dan diikat, sebelum dimasukkan ke dalam tong sampah.

(2) Apa-apa kaca pecah, tin dan benda yang tajam hendaklah dibungkus dan dimasukkan ke dalam bekas guna habis yang berasingan dan diletakkan bersebelahan tong sampah untuk dipungut.

(3) Tong sampah rumah hendaklah diletakkan di sebelah luar pagar, di lorong belakang rumah atau di mana-mana tempat lain yang ditetapkan oleh Majlis untuk memudahkan pemungutan sampah.

(4) Semua tong sampah hendaklah diletakkan di dalam kaki tong sampah, kebuk sampah atau seumpamanya yang diluluskan oleh Majlis.

(5) Selain sampah-sarap isi rumah, pembuangan sampah sarap kelengkapan rumah hendaklah tertakluk kepada undang-undang kecil 10.

Sampah di bangunan berbilang tingkat

8. (1) Di bangunan berbilang tingkat di mana pelongsor sampah telah disediakan, Perbadanan Pengurusan bangunan atau jika tiada Perbadanan Pengurusan seperti itu, penduduk bangunan itu hendaklah menyediakan dan mengadakan tong sampah yang mana hendaklah diletakkan di dalam kebuk sampah.

(2) Tong sampah itu hendaklah saiz yang cukup untuk memadamkan kebuk sampah yang disediakan di sebelah bawah pelongsor sampah dalam bangunan itu.

(3) Perbadanan Pengurusan bangunan atau penduduk hendaklah pada setiap masa menyelenggarakan pelongsor sampah, corong logam pelongsor dan pintu logam ke kebuk sampah.

(4) Jika tong sampah, pelongsor sampah, pintu logam, corong logam atau kebuk sampah tidak berada di dalam keadaan di mana ianya boleh digunakan dengan baik, Majlis boleh mengarahkan supaya Perbadanan Pengurusan bangunan atau penduduk atau pemunya premis menggantikan atau memperbaiki sebarang kecacatan.

Sampah-sarap taman

9. (1) Semua sampah-sarap taman hendaklah dimasukkan ke dalam beg plastik dan diletakkan dekat dengan tong sampah untuk dipungut.

(2) Sampah-sarap taman boleh dipungut oleh Majlis dengan bayaran fi.

Sampah-sarap kelengkapan rumah

10. Sampah-sarap kelengkapan rumah hendaklah –

a. Dibuang oleh tuan punya atau penghuni di satu kawasan yang ditetapkan oleh Majlis; atau

b. Di atas permohonan tuan punya atau penghuni, di buang oleh Majlis dengan fi yang ditentukan Majlis.

Buangan efluen

11. Tiada seorang pun boleh melepas atau menyebabkan atau membenarkan dilepaskan sebarang efluen kecuali efluen terolah yang mematuhi had pelepasan yang ditetapkan di bawah Jadual Ketiga, Peraturan-Peraturan Kualiti Alam Sekeliling (Kumbahan dan Efluen-Efluen Industri) 1979 [*P.U. (A) 12/79*], pada tempat atau tempat-tempat pelepasan efluen sebagaimana yang ditetapkan oleh Majlis dan diluluskan secara bertulis oleh Ketua Pengarah Jabatan Alam Sekitar.

Pembuangan buangan perindustrian dan buangan perdagangan

12. Apa-apa buangan perindustrian atau buangan perdagangan kecuali buangan yang disenaraikan dalam Jadual Pertama, Peraturan-Peraturan Kualiti Alam Sekeliling (Buangan Terjadual) 1989 [*P.U. (A) 139/89*], hendaklah dilupuskan oleh badan-badan perindustrian atau perdagangan yang berkenaan di mana-mana satu tempat longgokan sampah yang diselenggarakan oleh Majlis atau dengan cara yang ditetapkan oleh Majlis.

Kawasan tempat pembuangan sampah

13. (1) Tiada seorang pun boleh memasuki kawasan pembuangan sampah kecuali dibenarkan oleh Majlis.

(2) Walau apa pun yang terkandung dalam perenggan (1), Majlis boleh mengenakan fi yang tertentu sebelum kebenaran diberikan.

(3) Tiada seorang pun boleh mengais, menyelongkar atau mengalihkan apa-apa bahan buangan daripada kawasan tempat pembuangan sampah.

Membuang kenderaan buruk dan tidak berguna

14. (1) Apa-apa kenderaan buruk atau tidak berguna hendaklah dibuang oleh tuan punya di tempat pembuangan sampah yang ditetapkan oleh Majlis.

(2) Tuan punya kenderaan buruk dan tidak berguna boleh memohon kepada Majlis supaya kenderaan buruk dan tidak berguna itu dibuang oleh Majlis dengan membayar fi yang ditentukan Majlis.

Larangan mengganggu isi kandungan tong sampah

15. Tiada seorang pun boleh mengais atau menyelongkar, atau mengalih apa-apa jua benda, atau menumpahkan atau menyelerakkan apa-apa jua isi kandungan mana-mana tong sampah.

Larangan membakar bahan buangan

16. Tiada seorang pun boleh membakar atau menyebabkan dibakar bahan-bahan pembakar, sampah-sarap atau bahan buangan melainkan aktiviti-aktiviti yang ditetapkan sebagaimana di dalam Perintah Kualiti Alam Sekeliling (Aktiviti Yang Ditetapkan) (Pembakaran Terbuka) 2000 [*P.U. (A) 308/2000*] mengikut cara dan tempat yang diluluskan oleh Ketua Pengarah Alam Sekitar dan Majlis.

Larangan membuang arang batu, bahan letupan, dsb.

17. Sampah-sarap binaan, batu arang, bahan mudah terbakar atau bahan letupan tidak boleh dimasukkan ke dalam tong sampah rumah atau mana-mana tong lain yang disediakan untuk mengisi sampah tetapi hendaklah dilupuskan mengikut cara yang diperuntukkan bagi membuang sampah perindustrian.

Kawasan kampung

18. Tuan punya atau penghuni mana-mana rumah atau bangunan yang di dalam kawasan kampung hendaklah menyediakan lubang yang mempunyai saiz yang mencukupi untuk pengisian bahan buangan dan hendaklah bertanggungjawab untuk membuang bahan buangan tersebut sama ada dengan menanam atau membakarnya.

Fi

19. Majlis boleh dari semasa ke semasa menetapkan jumlah fi yang dikenakan di bawah Undang-Undang Kecil ini.

BAHAGIAN III

PENGUATKUASAAN

Kuasa penangkapan

20. (1) Datuk Bandar atau mana-mana pegawai diberi kuasa boleh menangkap tanpa waran mana-mana orang –

- a. yang semunasabahnya dipercayai olehnya telah melakukan suatu kesalahan di bawah Undang-Undang Kecil ini; atau
- b. yang enggan memberikan nama dan alamatnya apabila diminta atau jika ada sebab untuk meragui ketepatan nama atau alamat yang diberikan.

(2) Seorang yang ditangkap di bawah Undang-Undang Kecil ini hendaklah dibawa ke balai polis dan hendaklah dibawa ke hadapan seorang Majistret dalam masa dua puluh empat jam, melainkan jika sebelum dari masa itu nama dan kediamannya yang sebenarnya telah dapat ditentukan, dan dalam hal yang sedemikian orang itu hendaklah dilepaskan dengan serta-merta apabila dia menyempurnakan suatu bon untuk hadir di hadapan seorang Majistret jika dikehendaki sedemikian.

(3) Apabila mana-mana orang sedemikian dibawa ke hadapan seorang Majistret, Majistret itu boleh sama ada menghendaki dia menyempurnakan suatu bon, dengan atau tanpa penjamin untuk hadir di hadapan seorang Majistret sekiranya dikehendaki, atau boleh memerintahkan supaya ditahan dalam jagaan sehingga dia dapat dibicarakan.

Kuasa menyita

21. (1) Mana-mana pegawai diberi kuasa boleh menyita atau mengalihkan apa-apa barang atau benda yang menyalahi Undang-Undang Kecil ini dengan risiko ditanggung oleh pemunya.

(2) Apa-apa benda atau barang yang disita di bawah perenggan (1) ini adalah daripada jenis yang mudah rosak atau yang mengikut sifatnya lekas rosak atau jika penjagaan benda atau barang itu melibatkan perbelanjaan dan kesusahan yang tidak munasabah atau dipercayai akan membahayakan orang ramai, pegawai diberi kuasa oleh mengarahkan supaya benda atau barang itu dilupuskan mengikut acara yang ditentukan oleh Majlis.

(3) Mana-mana orang yang menuntut apa-apa benda atau barang selain benda atau barang yang disita di bawah perenggan (2), boleh menuntut benda atau barang tersebut daripada Majlis dalam tempoh minima tujuh hari bekerja atau maksima satu bulan dari tarikh benda atau barang itu disita tertakluk kepada apa-apa syarat dan pembayaran yang dikenakan oleh Pihak Berkuasa Melesen.

(4) Sekiranya, tiada apa-apa tuntutan dibuat selepas tempoh tiga puluh hari, Majlis bolehlah melupuskan benda atau barang itu mengikut cara yang ditentukan Majlis dan apa-apa hasil yang diperoleh hendaklah dikreditkan kepada Kumpulan Wang Pihak Berkuasa Tempatan.

(4) Datuk Bandar atau mana-mana pegawai diberi kuasa tidaklah bertanggungjawab kepada mana-mana orang bagi apa-apa kemerosotan, walau apa pun sebabnya, dalam kualiti apa-apa benda atau barang yang disita di bawah Undang-Undang Kecil ini.

BAHAGIAN IV

AM

Penalti am

22. Seseorang yang melakukan suatu kesalahan di bawah Undang-Undang Kecil ini yang baginya tiada penalti diperuntukkan dengan nyata boleh apabila disabitkan, didenda tidak melebihi dua ribu ringgit atau di penjara selama tempoh tidak melebihi satu tahun atau kedua-duanya, dan dalam hal sesuatu kesalahan yang berterusan boleh sebagai tambahan didenda tidak melebihi dua ratus ringgit bagi setiap hari kesalahan itu terurs dilakukan.

Pendakwaan

23. Tiada pendakwaan boleh dimulakan terhadap kesalahan di bawah Undang-Undang Kecil ini kecuali oleh atau dengan keizinan Pendakwa Raya.

Pengkompaunan kesalahan

24. (1) Datuk Bandar, Setiausaha atau Pegawai Undang-Undang Majlis boleh dengan keizinan Pendakwa Raya mengkompaunkan mana-mana kesalahan yang dilakukan di bawah Undang-Undang Kecil ini dan ditetapkan sebagai kesalahan yang boleh dikompaunkan dengan membuat suatu tawaran bertulis kepada orang yang disyaki telah melakukan kesalahan itu untuk mengkompaunkan kesalahan itu apabila dibayar kepada Majlis sejumlah wang yang tidak melebihi satu ribu ringgit bagi kesalahan itu dalam tempoh yang dinyatakan dalam tawaran itu.

(2) Sesuatu tawaran di bawah perenggan (1) boleh dibuat pada bila-bila masa selepas kesalahan itu dilakukan tetapi sebelum apa-apa pendakwaan baginya dimulakan, dan jika jumlah yang dinyatakan dalam tawaran itu tidak dibayar dalam tempoh yang dinyatakan dalam tawaran itu atau dalam apa-apa tempoh lanjutan sebagaimana yang dibenarkan oleh Datuk

Bandar atau Setiausaha atau Pegawai Undang-Undang Majlis, pendakwaan terhadap kesalahan itu boleh dimulakan pada bila-bila masa selepas itu terhadap orang yang kepadanya tawaran itu telah dibuat.

(3) Jika suatu kesalahan telah dikompaunkan di bawah perenggan (1), tiada pendakwaan boleh dimulakan selepas itu berkenaan dengan kesalahn itu terhadap orang yang kepadanya tawaran untuk mengkompaun telah dibuat dan apa-apa benda yang disita berkaitan dengan kesalahan itu hendaklah dilepaskan, tertakluk kepada apa-apa terma dan syarat yang telah ditetapkan.

(4) Kesemua wang diterima di bawah Undang-Undang Kecil ini hendaklah dibayar kepada kumpulan wang yang diwujudkan di bawah mana-mana undang-undang yang berhubung dengan kerajaan tempatan.

Kuasa pegawai polis di bawah Undang-Undang Kecil ini

25. Tiada apa-apa jua yang terkandung dalam Undang-Undang Kecil ini boleh mengurangkan kuasa seseorang pegawai polis untuk menyiasat apa-apa kesalahan di bawah Undang-Undang Kecil ini.

Pembatalan dan peruntukan peralihan

26. (1) Undang-Undang Kecil Pemungutan, Pembuangan dan Pelupusan Sampah-Sarap (Majlis Daerah Petaling) 1993 [*Sel. P.U. 20/1993*] dibatalkan.

(2) Apa-apa notis, perintah, kompaun, lesen atau dokumen yang dibuat atau dikeluarkan di bawah Undang-Undang Kecil yang dibatalkan atau yang dibuat dahulu hendaklah terus terpakaidan berkuat kuasa, setakat yang tidak bertentangan dengan Undang-Undang Kecil ini seolah-olah telah dikeluarkan atau dibuat di bawah Undang-Undang Kecil ini sehingga dibatalkan.

Dibuat oleh Majlis Perbandaran Subang Jaya dalam mesyuaratnya pada 31 Mac 2007.

ADNAN BIN HAJI MD IKSHAN
Yang Dipertua
Majlis Perbandaran Subang Jaya